

UNIVERZITET U BIHAĆU
PEDAGOŠKI FAKULTET

K O D E K S
PONAŠANJA STUDENATA
PEDAGOŠKOG FAKULTETA UNIVERZITETA U BIHAĆU

Bihać, mart 2013.

Na osnovu člana 33. Zakona o visokom obrazovanju USK-a ("Sl. glasnik USK-a", broj: 8/09) i člana 104. Statuta Univerziteta u Bihaću, Nastavno-naučno vijeće Pedagoškog fakulteta na 6. redovnoj sjednici u ak. 2012/13. godini, održanoj dana 12. marta 2013. godine, donosi slijedeći

K O D E K S

PONAŠANJA STUDENATA

PEDAGOŠKOG FAKULTETA UNIVERZITETA U BIHAĆU

I. OPĆE ODREDBE

Član 1.

Kodeksom ponašanja studenata Pedagoškog fakulteta Univerziteta u Bihaću (u daljem tekstu: Kodeks) bliže se reguliše ponašanje, prava i obaveze studenata Pedagoškog fakulteta Univerziteta u Bihaću (u daljem tekstu: Fakultet).

Cilj Kodeksa je da propiše norme ponašanja na Fakultetu.

Član 2.

Studenti, nastavnici, saradnici i ostali zaposlenici Fakulteta trebaju zajedničkim snagama ustrajati na stvaranju optimalnog okruženja i uvjeta za ostvarenje časnog akademskog djelovanja.

Kodeks se prvenstveno temelji na želji studenata i svih zaposlenika Fakulteta da se izbjegnju i eliminiraju neprihvatljiva ponašanja.

Kodeks se temelji i na ideji njegovanja i unapređenja moralnih akademskih vrijednosti, kreiranja optimalnih radnih uslova, afirmisanja rada i odgovornog ponašanja svakog člana akademske zajednice.

Svaki student i svi zaposlenici Fakulteta trebaju biti upoznati s ovim Kodeksom.

II. OBAVEZE STUDENATA

Član 3.

Studenti su obavezni da:

- poštuju zakonske odredbe i Statut Univerziteta u Bihaću,
- redovno pohađaju rasporedom utvrđene časove predavanja, vježbi i ostalih oblika nastave,
- nadležnim fakultetskim službama blagovremeno podnesu potrebne dokumente, prijave ispita, ovjere semestar i sl.,
- izvrše svoje obaveze vezane za plaćanje školarine u dogovorenim rokovima, jer u protivnom neće imati mogućnost pohađanja nastave i polaganja ispita,
- međusobno (kao i sa zaposlenima na Fakultetu) komuniciraju s poštovanjem i u skladu sa pravilima lijepog ponašanja,
- poštuju moralna načela i pravila akademskog ponašanja uvijek, a posebno u toku provjere njihovog znanja. U slučaju neprimjerenog ponašanja i nepoštovanja institucije čiji su studenti, službe Fakulteta za to nadležne imaju pravo da preduzmu adekvatne disciplinske mjere (npr. u slučaju korištenja nedozvoljenih sredstava tokom ispita, studentu se na licu mjesta izriče zabrana izlaska na sve ispite u narednom ispitnom roku),

- učestvuju u svim aktivnostima koje se tiču studenata,
- poštuju pravila odijevanja koja su primjerena za sve javne ustanove,
- čuvaju fakultetsku imovinu i okoliš.

III. PRAVA STUDENATA

Član 4.

Prava studenata su definisana Ustavom BiH, Okvirnim zakonom o visokom obrazovanju u BiH, Zakonom o visokom obrazovanju USK-a, Statutom i drugim općim aktima Fakulteta, a posebno:

- jednaka i neotuđiva prava bez obzira na rasu, nacionalnost, vjeru, pol, politička i druga uvjerenja i ubjeđenja, socijalni status i druge razlike,
- pravo na izražavanje vlastitog mišljenja u skladu sa pozitivnim zakonskim propisima i načelima akademske zajednice,
- pravo na učešće u svim vannastavnim aktivnostima, studentskim organizacijama i asocijacijama,
- pravo na uvid u evidenciju o postignutim rezultatima i diskreciju po tom pitanju,
- pravo na pristup administrativnim službama Fakulteta u njihovo radno vrijeme,
- pravo na konsultacije prema rasporedom predviđenim terminima,
- pravo da od nastavnika i saradnika zatraže pomoć u savladavanju nastavnog plana, ali i svih dodatnih uputstava oko nabavke literature i ostalog potrebnog nastavnog materijala,
- pravo na blagovremeno obavještanje o rasporedu nastave, ispita i ostalih aktivnosti na Fakultetu,
- pravo na korištenje fakultetskih resursa (čitaonica, biblioteka, računara i sl.),
- pravo na zaštitu od bilo kakvog fizičkog ili psihičkog maltretiranja,
- pravo na fer i korektan odnos od strane svih zaposlenih,
- pravo da se pita i dobije pravovremen odgovor (molbe, žalbe, sugestije i sl.),
- pravo na nagradu ili stimulaciju za marljiv rad, dostignuća ili afirmaciju Fakulteta u lokalnoj zajednici i šire.

Član 5.

Neprihvatljivo ponašanje

Pod neprihvatljivim ponašanjem u najširem smislu se podrazumijeva:

- nepristojan i nekorektan odnos prema nastavnicima, saradnicima i ostalom nastavnom i vannastavnom osoblju zaposlenom na Fakultetu ili prema drugim studentima,
- upotreba pomagala na ispitima (knjiga, skripti, elektronskih pomagala), osim u slučajevima kada su ona eksplicitno dozvoljena (suprotno će biti sankcionisano kao što je ranije navedeno),
- kašnjenje, nedolazak ili napuštanje bilo kog oblika nastave i neispunjavanje ostalih nastavnih obaveza (predmetni nastavnik ima pravo da studentu koji kasni onemogućí pristup predavanju),
- ometanje nastave na bilo koji način,
- lažno predstavljanje, prisustvovanje provjerama znanja u ime druge osobe, falsifikovanje tuđeg rada i prezentovanje istog kao svog,
- falsifikovanje dokumenata vezanih za studiranje i ostvarivanje studenskih prava,

- dolazak na bilo koji od oblika nastave pod utjecajem alkohola ili opojnih droga,
- prouzrokovanje materijalne štete ili otuđivanje imovine Fakulteta,
- i sva ostala djela koja su u suprotnosti s moralnim normama prihvaćenim u društvu te djela koja su zakonom utvrđena kao krivična djela.

IV. KRIVIČNE ODREDBE

Član 6.

U slučaju povrede Kodeksa ponašanja protiv studenata se pokreće disciplinski postupak u skladu sa Pravilnikom o disciplinskoj odgovornosti studenata Univerziteta u Bihaću.

V. PRELAZNE I ZAVRŠNE ODREDBE

Član 7.

Izmjene i dopune ovog Kodeksa donose se po istom postupku po kojem je i donijet Kodeks.

Ovaj Kodeks stupa na snagu danom donošenja od strane Nastavno-naučnog vijeća Fakulteta.

Kodeks će biti objavljen na oglasnoj ploči i službenoj web stranici Fakulteta.

**UNIVERZITET U BIHAĆU
PEDAGOŠKI FAKULTET**

Broj: 0204-723/13

Datum: 12. 03. 2013. god.

**PREDSJEDNIK NNV-a
D E K A N**

.....
Prof. dr. sc. Nijaz Skender

Ovaj Kodeks objavljen je na oglasnoj ploči Fakulteta dana 12. marta 2013. godine i stupio je na snagu dana 12. marta 2013. godine

**PREDSJEDNIK NNV-a
D E K A N**

.....
Prof. dr. sc. Nijaz Skender